

SVJETLO UMJESTO MENE

Predavanja o Islamskoj gnozi

MUΤAHHARÎ - ṖABĀṬABA᠀ - ḥUMAYNÎ

Prijevod, komentar, esej:
MELIKA SALIBEG BOSNAWI

POGOVOR:

Bismillâh irrahmân irrahîm

Jednom književniku po vokaciji, prevodjenje ovakvih tekstova nipošto ne može biti, sâmo po sebi, umjetničkim izazovom. No možda baš utoliko više jest zovom na putovanje, suštinski esteticizam kojeg nam najavljuje svjetionička narav ovih autora, i njihovih djela.

Ovaj prijevod, dakle, jest utoliko više zovom na putovanje - prema unutra. Na sami izvor (i) estetskog, spoznaja kojeg se zbiva kao umjetnički čin najvišega reda. Ovaj prijevod jest, dakle, utoliko više (i) umjetničkim izazovom, čija se vanjska estetska forma pritajila zarad...

No prije no što nastavim priznavati, i uz pomoć gornjih stranica odavati, šta je to što je mene - jednog notornog pisca - natjeralo da se latim prevodjenja štiva koje nije mnogo, ili nikako, formalno-književno estetično, dopustite mi pokoju obavijest o njegovim autorima.

Al-’Alâma Šâhîd Murtadâ¹ Muṭahharî rodjen je 1920, u mjestu Fariman, u Îrânu, gdje prima i prvo obrazovanje od svoga oca, Šayh Muhammada Hüsayna. I početak i nastavak školovanja, najprije onog petogodišnjeg u svetom gradu Mašhadu, a potom petnaestogodišnjeg u, takodjer svetom, Qumu, i obećavaju i ne obećavaju ništa posebno. Jer, u iranskim duhovnim i znanstvenim prilikama, dio je biografija mnogih da su odrastali, u svojoj ljudskoj općenito, i u svojoj znanstvenoj i duhovnoj dimenziji posebno, u sjeni Imâma Riđe (‘a)², u mjestu njegova šahâdata³, i da su se godinama svekoliko napajali iz njegova nepresušnog vrela. Ali i iz vrutaka znanja koje stoljećima, okolo Imâmove svetišta, zasadjuju najveće figure islamske, pobliže šîtske misli. Ništa, zatim, neobično, čitamo u Muṭahharievoj ili sličnim biografijama, da je put saznavanja i spoznavanja mnoge vodio, ili odvodio, iz ovih medresa⁴ i knjižnica, u takodjer prebogate hoze i biblioteke drugog jednog grada-svetilišta i učilišta, Quma. Gdje se ove institucije znanja, uz prelijepe i sjenovite javne džamije, i još ljepše i još zakriljenije mistične pritaje, već stoljećima grozde oko groba jedne čestite Fâtîme (r.a.). Imâm Riđine (‘a), naime, sestre, smrt koje upravo na tom mjestu, na putu prema njezinu izgnanom bratu, ne prestaje davati život, ne samo učenju i spoznaji odabranih,

¹ Njegovi iranski sunarodnjaci izgovaraju njegovo ime Murteza.

² Osmi Imâm iz Poslanikove (ş) Kuće, Imâm Riđâ (‘a), čije ime Iranci izgovaraju Riza.

³ Mašhad, mjesto šahadata.

⁴ Termin medresa u najširem smislu riječi znači učilište, i nipošto se ne smije svesti na značenje koje ona ima u nas, tj. škola koja daje srednješkolsko vjersko obrazovanje. Medresa, ili kako se ona zove u Îrânu, hoze-ye-‘îlmiye (kraće hoze), zadržava isti naziv kroz sav period školovanja, koje najčešće traje oko šesnaest godina, i pokriva sve oblasti znanja, od teologije do matematike i muzike, časove iz kojih student sam izabire da slijedi, po vlastitom nagnuću.

već nepreglednim karavanama studenata i vjerničkih masa koje njihova vjera poučava voljeti i slijediti: Istinu, Imâma, i Iluminaciju. Prvu, Vječno živu, objavljenu ljudima kroz Poslanstvo i Svetе knjige. Drugog, Imâma vremena, iz roda Najčasnijeg od njih, Muhammada (š). I treću, u svim njezinim značenjima: kao učenje, i kao znanje, kao vrhunsku spoznaju, i kao unutarnje prosvijetljenje.

Ovakav je put formalnog školovanja prešao i Murtadâ Muṭahharî, pod nadzorom svojih velikih učitelja, 'Allâme Ṭabâṭabâ'ia i Imâma Ḥumaynia, neka im je svoj trojici posvećena njihova tajna, prije nego što je na Tehranskom sveučilištu i sam počeo druge podučavati teologiji i drugim islamskim znanostima.

Ništa posebno, reklo bi se, ima li se u vidu stanje znanja i duha koje u Irânu vlada već stoljećima. Pa ipak sve tako neobično. I kad je riječ o učeniku, na početku, i kad je riječ o učitelju, u sredini, i kad o mučeniku (pogrešna li prijevoda! svjedoku!), na kraju.

Jer teme iz oblasti islamskog vjerovanja i islamskog prava, ni student ni profesor ni pisac ne izučava, ne podučava, i ne raspravlja u svojim knjigama izvan cjelovitog corporusa Islâma. Ali niti izvan vremena, svôg, to jest ovog našeg, suvremenog. To znači, vremena sveopćeg ljudskog otudjenja od Boga i Njegove objavljene religije, ali i otudjenja te religije od njezinih izvornih sadržaja koje samo njezino arapsko, neprevodivo ime *Dîn-i-Islâm* podrazumijeva: od bogoslužja, preko etike, estetike i ekologije, do politike i spoznaje najvišega stupnja.

Tako su, i tu je Muṭahharî poseban i medju rijetkima, predmetima njegova studiranja, poučavanja i pisanja postali: i egzegeza Qur'âna (kojeg brani od marksističkih tumačenja),

i filozofija (kojoj vraća neopravdano oduzetu sakralnost), i etika (kojoj vraća moralnu praksu), i sociologija (kojom potvrđuje da je Šari'at, to jest Vjerozakon, na ravni prirodnog zakona u oblasti društvenog), i historija (koju čisti od navade laganja), i politika (koja, kako je naučio i u praksi od svog duhovnog oca, Imâm Humaynia, nije nužno prljava i nipošto "prostitutka" ako je uistinu islamska), i, na kraju, gnoza (unutar kojeg kozmosa ne prestaje bivati putnikom do kraja svog života).

Čega god da se laćao, na koje god pitanje da je odgovarao, šta god da je tumačio ili radio, kuda god da je putovao, Muṭahharî je bio cjelovit, i utoliko poseban. Jer malo je ljudi, u svim vremenima, koji su u svemu tako potpuni, neotudjeni, nepodjeljivi: i teoretičar i praktičar, i pozivatelj i pozvani, i opomenitelj i opomenuti... zajedno. Integralno biće kakvим ga baš Qur'ân i Islâm hoće. I kakvim ga je Bog stvorio.

Tako je učenik hoze-ye-‘ilmîyyâ Mašhada i Quma i učitelj Tehranskog sveučilišta, Murtaḍâ Muṭahharî, putovao i okončao svoje zemaljsko putovanje. Mučenička smrt jednoga dana, ni po čemu važnog, na jednoj tehranskoj ulici, ni po čemu posebnoj, na povratku s jedne rane jutarnje molitve i ranih konzultacija s političkim suradnicima, krunisala je dugogodišnja mučenja kojima je tiranska vlast lažnog šâhin-šâha uzalud nastojala ugasiti "*u dubinama njegova bića, osjećanje tuge, i duh revolucije*"⁵. Osjećanje i duh koje je on djelio s milionima svojih suvjernika u Irânu i diljem svijeta, u čija srca je, posredstvom Muhammada (š) i njegova Ahlu'l-

⁵ Šayh Muhammad Mahdi Šamsu'd-Dîn, *The Rising of al-Husayn, Its Impact on the Consciousness of Muslim Society*, ed. The Muhammadi Trust of Great Britain and Northern Ireland, 1985.

Bayta (‘a), ušla maḥabba. Ljubav, naime, za njihov Dīni-Islām, i strast za mučeništvom. Za posvjedočenjem Boga, za najkraćim putem, usudjujem se reći, do *fanâ'*, do nestajanja, do potpunog utapanja u Allāhovu Biću, o čemu govore, sanjaju i u čemu okončavaju svoja duhovna putovanja islamski gnostici.

U duši ovoga Qoqnusa⁶, nazovimo našeg Šahīda Muṭahharia tako izvorno perzijski umjesto imenom Fenix, nikakva patnja ni strah od nje nisu mogli ubiti nagon za djelanjem na Božijem putu. Ali, zar profinjena spoznaja nije samo za one koji se "otkače" od profanog života? upitat će neupućeni. Čak i od Vjerozakona, dodat će smutljivci. Zatim, pitat će ostali njima nalik, šta će jedan revolucionar u ovoj knjizi o ‘irfānu, koju je njezin iranski izdavač i priredjivač na engleskom⁷ nazvao tako lijepo, "Svjetlo unutar mene"? Je li on medju ovim koricama samo zato da izloži njegov povijesni i "tehnički" aspekt?

Nipošto! Murtadā Muṭahharī, neka je posvećena njegova tajna, kao i ostala dva autora iz ove zbirke tekstova o gnozi, prešao je sve etape duhovnog putovanja. Njegova revolucija i njegova šahīdska "smrt" bili su ono što je on prirodno polučio na posljednjem od njih.

Sadrū'd-Dīn Muḥammad Šīrāzī, poznatiji kao Mullā Ṣadrā, veliki iranski gnostik, teolog, mistik, filozof, jednom riječju ḥakīm, kako bi on sam sigurno najradije da ga zovemo, možda najveći u svemu ovom u posljednjim

⁶ Iranci ga izgovaraju Kognus. Kako bi se ovdje rado lingvistički poigrao pisac u nama. Uz to i latinac, to jest klasičar, koji je u svojoj davnoj Klasičnoj gimnaziji naučio da *cognosco* znači spoznavati. Pa ne znači li to upravo to, da je Kognus, da je Fenix, onaj čovjek koji se, stalnim spoznavanjem, uviјek iznova izdiže iz pepela (svoga neznanja) u novi život!?

⁷ Ansariyan Publications, Qum.

stoljećima, ne samo na Istoku već i na Zapadu (kad bi ovaj samo htio oslušnuti svoj Is-tok), opisao je četiri stupnja duhovnog putovanja, koje smo našli spomenute na prethodnim stranicama. Posljednji od njih, i dakle najviši, jest, poučava Mullâ Şadrâ, putovanje sa Stvoriteljem u Stvorenom; radi poduke, i radi predvodjenja.

Pogledajmo koliko praktične mudrosti u prividno samo metafizičkom nauku iranskog mudraca iz 16 stoljeća, koji nas uči tako "profanoj" stvari kao što je:

da nam učiteljem i vodjom može biti tek istinski mudrac, tek onaj koji je spoznao Bitak i Njegova svekolika očitovanja, koji je svojim teorijskim ali i moralnim, djelatnim naporom, spoznao šta je to supstancijalno a šta akcidentalno, koji zna otkud i šta su priroda i duša, koji je prešao put od teozofa do znalca duha (o kojem je, kako Qur'ân kaže, tako malo znano), koji je spoznao porijeklo sebe i svijeta, koji je poništio svoje ja u Izvoru, e da bi u Njem kao takvom preživio... tek, dakle, takav čovjek, savjetuje nas ova *filosofia prima*, može doći nazad medju nas, u svoj svojoj sazreloj svijesti, da nas podučava, i da nas predvodi.

Upravo u ovom četvrtom putovanju sadržana je tajna Muṭahharieve posebnosti, kao i posebnosti njegova velikog učitelja i slijedećeg autora iz ove knjige, al-'Allâme Muḥammada Sayyid Husayna aṭ-Ṭabâṭabâ'ia.

Nemamo li pred sobom samo jedan jednostavan pedagoški rad, skriptu iz gnoze, pa kako zaključiti da je njezin autor izuzetan? Na ovu teškoću naići će samo nepućeni, ili samo površan čitatelj. Ove tek naizgled jednostavne (da ne mogu biti jednostavnije) obavijesti i poduke o 'irfânu daje, jednodušno, najveći suvremeni tumač

Qur'âna. Pa ipak, ko je on, upitat će prosječan bosanski čitatelj?

Da je kojim slučajem neka tegleća životinja trebala prenijeti, od njegova qumskog doma do njegova qumskog groba, sav njegov ovozemni posjed, desilo bi se slično kao u slučaju jednog drugog mudraca, nama poznatijeg Averoeса, to jest Ibn Rušda. O kojem se priča da je na njegovu posljednjem putovanju – dženazi, iz mjesta umiranja do mjesta pokapanja, teret njegovih knjiga sa jedne strane magarečih sapi bio u ravnoteži sa teretom uprćenim s druge strane, a koji je predstavljao sav njegov zemni imetak.

No u slučaju našeg 'Allâme, ako isto uprćena, prijenosnica bi izgubila ravnotežu, čak možda i pala. Jer, naspram njegovih knjiga, stajao je samo život proveden u krajnjoj oskudici. Askezi, ako više volite, no u svakom slučaju u gotovo krajnjem siromaštvu tijela zarad gotovo savršenstva duha, težinu kojeg mjere neki drugi mîzani.⁸

Pa sve kad bi 'Allâmin 20-tomni istoimeni tafsîr⁹ Qur'âna, *Al-Mîzân*, bilo jedino što je taj suvremeniji hâkîm ostavio iza sebe, bilo bi to sâmo po sebi dostatno da poremeti ravnotežu izmedju običnog i posebnog, čak i u iranskim znanstvenim i duhovnim prilikama.

Jer je i Sayyid Muhammed Hüsayn aṭ-Tabâṭabâ'î, prije nego što je zaslužio najveću znanstvenu titulu u islamskom svijetu, al-'Allâma, bio samo jedan od tisuća kojemu su učilišta, knjižnice, džamije i mistične pritaje an-Nadžafu'l-Ašrafe tako nesebično (o)davale znanja u svim godinama njegova formalnog obrazovanja; iz gotovo svih oblasti.

⁸ Vage.

⁹ Tumačenje, egzegeza.

Rodjen u Tabrîzu 1904, gdje se školuje do 1923, ovaj potomak Imâm Ȣasana ('a) i sin generacija ší'skih učenjaka, odlazi u najveći svjetski centar islamskog znanja, Nadžaf, u Iráqu, da obavi svoje visoke studije. Sretnog li učenika Šayh Muhammad Husayn Nâ'inia al-Ğarâwia, koji "je klesao sama sebe u niši historije", kao što to kaže *Al-Mîzan* prevoditelj na engleski, 'al->Allâma Sayid Sa'îd Ahtâr ar-Radawî, u svom predgovoru. Zatim učenika Šayh Muhammad Husayn al-İsfahânia, prvaka medju filozofima, književnicima i pjesnicima, *Ziyâ'u'd-Dîn al-’Irâqia*, 'Allâme Abû'l-Qâsimâ Ğâfar Hwansâria, "Matematičara", te filozofa i metafizičara al-Bâdkûbia, etičara 'Alî Âge aṭ-Tabâṭabâ'ia, kod kojih zajedno uči pravo i njegove temelje, ali i sve ostale islamske znanosti: filozofiju, povijest, etiku, matematiku..., kao i one tajne, o kojima životopisi ovakvih ljudi i njihova pedagoška djela obično šute. Kakva će čuda otkriti kad ga njegovi učitelji, na primjer, uvedu u gnozu Ibnu'l-'Arabie nije za uši onih koji ne čuju glasove sfera, niti za um koji sama sebe uzima za posljednji kriterij svega.

Al-'Allâma aṭ-Tabâṭabâ'î nije, doduše, na Muṭahhariev način obavljao niti okončao svoje četvrtu putovanje - s Bogom medju stvorenjima. Pothvat kao što je tumačenje cjelokupnog Qur'âna traži cijelog čovjeka, čitav jedan ljudski vijek, i iskupljuje ga za odsustvo u svakom drugom poslu. Ali ga je u praktičnom islamskom revolucioniranju suvremenog otudjenog i izgubljenog čovjeka (što je on teorijski već obavio na stranicama svoga velikog djela) pretekla i smrt.

(Dopustite mi kratku, tužnu, stanku. Ja nisam bivala jedinim posjetiteljem njegova groba, u harem Ma'sûmine¹⁰ džamije u Qumu, kojeg su pri svakoj posjeti svladavale nezadržive suze. Niti jedina koja sam tu, pored 'Allâme, zajedno s ostalom njegovom duhovnom djecom, morala uvijek biti s Qur'ânom u rukama, ili knjigama dova, ili njegovim vlastitim knjigama. (Neka mi oprosti moj čestiti babo Hakija r., ali ja sam na tom grobu, u dalekom Qumu, bivala više doma, i ostavljenijom nego li na njegovu, u ovom pregrubom svijetu lažnih idola. No, nije li me upravo on, moj biološki otac, učio od malehna, i ostavio mi u amanat, da bježim iz ovog bosanskog vilâyata u Zakafdak?!)¹¹

Prije svoje prirodne smrti, čitav jedan ljudski vijek gotovo neprirodnog, do te mjere neumornog, 'ibâdata, učenja, pisanja i pedagoškog rada, na putu prema Vječnosti. Svršeni student koji živi svoje znanje vraća se najprije u svoje rodno mjesto, u svoje zemaljsko polazište, Tabrîz, gdje neko vrijeme podučava višoj filozofiji manju grupu odabralih studenata. No njegovi svekoliki talenti, kako bi opet rekao njegov prevodilac, vuku ga u Qum, u iranski znanstveni epicentar. Etika (koju živi), filozofija (koja u sprezi s prvim postaje hikmatom), egzegeza Qur'âna (prvog izvora svih ostalih znanja, kojeg gotovo da savršeno otjelovljuje), javni pedagoški, i pritajeni gnostiči rad, sve do svoje smrti 1981 – eto otprilike formalnog zbira ove veličine, summe jednog skoro apsolutno samozatajnog života.

¹⁰ Već spomenute Fâtîme ('a), sestre Imâm Ridââ ('a), oko čijeg su se groba, tokom povijesti, formirale medrese, to jest hoze, knjižnice, i čitav grad koji je postao jedinstveno (sve)učilište.

¹¹ Kâf, kozmička planina.

Za velike gnostike kažu da gotovo nikada ne upotrijebe ličnu zamjenicu ja. 'Allâma Ṭabâṭabâ'î, neka je posvećena njegova tajna, sve je manje živio to ja, a sve više umirao kao takav, dok u jednom, za svoju okolinu nevidljivom, trenu, nije nestao u svome Iskonu. A potom nastavio živjeti samo u Njem, Vječnom.

I pred ovim 'ârifom, "Ljepotica" je skinula, i Svoja vela mraka, i Svoja vela svjetla. Tek takav 'Allâma vratio se, jednoga dana, drugima nezamjetljivo da je i bio otisao, medju nas, da nas podučava: ko smo, odakle, i kuda nam je svima, na koncu, ići. Vratio se 'Allâma, kao i svi takvi putnici, da putuje s Bogom medju nama, neukima, no vratio se drugačiji. Već mrtav za ovaj svijet, sve više nalik svom grobu od dugih postova šutnjom, prije no što nas je, 1981., napustilo i njegovo tijelo. Ali, nije takav učitelj, za Laž mrtav i živ samo za Istinu, učio jedino nas koji smo imali sreću biti njegovim su-vremenicima. Odsutne onda, danas podučavaju i vode njegova egzegeza Qur'âna i druge njegove knjige. Njegov posjed zbog kojeg bi tegleća životinja, da je morala...

Isti je slučaj i sa posljednjim autorom u ovoj knjizi, koji je, praznih ruku, preselio iz ovog, prolaznog, carstva, lažnog, sjaja u, vječno, carstvo *Syjetla nebesa i zemlje*. Evo još jednog, možda najneobičnijeg, putnika četvrtoga puta, Imâm Sayyid Ruhullâh Mûsawî al-Humaynia, "siromaška", čijom oporukom nije imalo ama baš ništa da se podijeli njegovim neposrednim krvnim nasljednicima, no čija je wasijetnama ostavila neizmjerno blago generacijama koje dolaze.

Evo nas na mjestu najveće karizme za umne, i za istinske muslimane, u ovom stoljeću. (Ili možda stoljećima, sve od vremena od kada je iz očiju vjernih muslimana nestao

i posljednji Allâhov Huğât, savršeni Božiji Dokaz na zemlji, mir neka je s njim!). Ali, evo nas i na mjestu najveće smutnje za vječno-neodlučne, i najveće prijetnje za one - *koji se uzohole, pa postanu nevjernici* -.

Ako sam prvog autora u ovoj knjizi osjećala uvijek najbližim na mjestu njegova posljednjeg i najvećeg posvjedočenja Allâha, na mjestu njegova šahadata, ako mi je drugi uvijek bio najbližim na njegovu šutljivu grobu koji mu je toliko nalik, ovaj treći je meni, utopljenoj u oceanu, vodu kojeg nepresušno proizvodi moj nenadoknadiv gubitak, bio uvijek najbližim u mjestu svog posljednjeg zemaljskog obitavališta.

Čamaran, seoce na sjeveru Tehrana, ispod vječno sniježnih, asketski golih, i mudrih planina. Moje zakašnjenje da na vrijeme, prije Imâmove smrti u tehranskoj bolnici 1989, stignem do njegove ḥusaynie¹² i do kuće, dugo sam, jako dugo pripisivala samo vlastitoj grijesnosti. Samo vlastitoj nezasluženosti da poljubim ruku čovjeka – *kroz čiju je osobu i svijest prošao Apsolut* - kako bi to rekao Robin Woodsworth Carlsen. Jedan čestiti Zapadnjak, filozof, pisac i novinar, koji je u tom (u njegovoj civilizaciji najomraženijem) rušitelju idolâ video čistu "suprotnost brutalnom sekularizmu, luhkotnom hedonizmu, i opsesivnom egoizmu, crt(ama) koje dominiraju Zapadom".¹³ I u čijem je

¹² Husaynije su velike dvorane u područjima nastanjениm ší'ima, u kojima se obilježava Kerbalska bitka, tj. 10 Muharram, ali i ostali značajni datumi iz islamske historije. Mjesta se takodjer koriste i za predavanja, kao i za ostala vjerska okupljanja.

¹³ Iz "Kaškû I - Susret sa Imâm Humayniem", iz pera filozofa, novinara i publiciste, Robina W. Carlsena. Zapadnjaka koji je svjetu dao krajnje iskrene i bogate analize možda najvećih fenomena dvadesetog stoljeća: Imâma Ḥumaynia, Islamske revolucije, i Islamskom revolucijom preobraženog Irâna. Prijevod na bosanski nači u magazinu Iranskog kulturnog centra *Kalem*, Sarajevo, 1998.

prosvijetljenom licu sveca prepoznao sami "blagoslov Bîća, blagoslov punine žića", i beskrajno ga zavolio.

Ja nisam ovdje da pričam ni o Robinovoj, ni o svojoj ljubavi, već o Imâmu najveće islamske revolucije u povijesti, poslije one Muhammadowe (ş) i Imâm Husaynove ('a). Šta još da dodam o nekom koga je upoznao (?) čitav suvremeni svijet? Nekom "koga", kako mi reče Vladimir Dedijer nakon svoje posjete Imâmu i Revoluciji, "čovjek može voljeti ili mrziti, ali kojem ni u kom slučaju ne može poreći svetost, koju čak i zrak, u obliku oreola, oko njega svjedoči".¹⁴

Ja možda uistinu nisam bila zavrijedila da se još za Imâmove života isplačem na mjestima na kojima caruje njegova krajnja zemaljska skromnost (štoviše, siromaštvo!). Ali ona i danas ne samo mene (zar ne Robine?), zajedno s njegovim ukupnim djelom, neodoljivo čine boljom, pri svakom novom susretu.

Možda je (i) mene na putu prema mom Imâmu omela zapravo izdaja koja se i danas potpisuje imenom njegove Islamske revolucije? Možda je ona već tada nepogrješivo prepoznavala i proganjala upravo one Imâmove sljedbenike kojima je prvi učitelj u Islâmu, i u 'irfânu, bio ihlâş - iskrenost?!

Šta preostaje čovjeku koji živi daleko od centara znanja, tako strašno daleko od istinskih učitelja, tako tragično lišenom istinske vjerske braće i sestara? Kako da takav

¹⁴ Prilikom jednog post-zatvorskog beogradskog susreta vašeg prevodioca sa gospodinom Vladimirom Dedijerom, ovaj potonji je oduševljeno pričao o svojoj posjeti Imâmu u povodu prve godišnjice Islamske revolucije. Gospodin Dedijer je tom prilikom zaiskao od vašeg prevodioca i priredjivača ove knjige, inače književnika, suradnju na pisanju njegova "Teheranskog dnevnika". Imajući mnogo razloga za to, prijedlog je bio odbijen, ali je ostalo svježe sjećanje na nevjerojatno oduševljenje koje je jedan komunistički intelektualac pokazao za ličnost mnogo napadanog muslimana. Oduševljenje jednog komunističkog istočnjaka, začudno, malo se razlikovalo od oduševljenja jednog kapitalističkog zapadnjaka, naime gospodina R.W. Carlsena, kojeg smo naprijed citirali.

čovjek putuje prema Svjetlu, kad oko njega vlada samo mrkli mrak?

Zar se zabadava kaže da je Sûratu'l-Ihlâş, Poglavlje Iskrenost, srce Qur'âna, Allâhova Časna knjiga u malom? Samo uz pomoć te iskrenosti, tog prvog učitelja, ja sam mogla nekoć odgovarati na sve upite o svom stanju (usred terora) da - kad god pogledam unutra (to jest, u se), vidim samo Svjetlo, a kad pogledam van, samo tamu.

Onda su došle Imâmove knjige. Djela koja su polučila godine učenja. Najprije u rodnom mjestu al-Humayun, gdje uživa privatnu poduku. Potom studije literature u Araku, i sveislamske studije u Qumu. Âyatollâh Haîrî samo je jedan od slavnih koji poučava ovog neumornog učenika u teologiji, islamskom pravu, filozofiji, astronomiji, gnozi. Oni koji ga predstaviše sa čele-kulom na glavi u obliku crne, sayyidske imamije, bi li ti bezumnici bili u stanju išta razumjeti od njegovih predavanja iz filozofije, iz Ibnu'l-'Arabieva nedostižna 'îrfâna, ili iz njegovih predavanja i knjiga o snovima, na primjer? Da li bi povjerovali da je taj mrski fundamentalist (!!!) imao dušu koja, gnostiči, pjeva:

*"Poljubite ruke šejha
koji me optuži za herezu.*

*I pomilujte pozornika
koji me stavi u okove".¹⁵*

Ili, ko bi uopće, neupućen, povjerovao da je ovaj qumski djak, potom qumski i nadžafski učitelj, da je ovaj vodja jedne revolucije koja je potresla zemaljsku kuglu, da je ovaj i vjerski i politički lider - imâm miliona muslimana u

¹⁵ Iz zbirke "Flowers of knowledge", izdate u povodu četverogodišnjice Imâmove smrti, u Islamabadu, u Pakistanu, na perzijskom izvorniku, kao i u prijevodu na engleski.

dvadesetom stoljeću - napisao u svojim (gnostičkim) osamama slijedeće, "heretičke", redove:

*Mladež uzapti me, o Prijatelju, s Tvojih usana
Tvoje bolesno oko vidjeh, i bolestan postah
Izgubih pamet, pa dram udarih "Ja sam Istina"
Poput Mansûra kupac vješala postah
U dušu žeravicu ubaci mi svojom tugom Voljena
Do guše se najedoh, i glasovit u čaršiji postah
Noću i danju mojoj pojavi otvarajte vrata mejhana
Od masdžida i škole umoran postah
Asketizma i licemjerja strgnuta je s mene haljina
Ogrnuh se haljom tekijskog pira i otrijeznih
Dojadi mi pojava propovjednika savjetâ puna
Od vinopije umrljana pomoć zaiskah
Dopustite mi da se hrama spomenem
Ja se od ruke Idola mejhane probudih¹⁶*

Ovako je, za nepovjerovat, zar ne! pjevala, poput starih ârifa i šûfija, najkontroverznija ličnost posljednjih stoljeća ljudske povijesti. Njegova je revolucija donijela, izmedju ostalog, na prag naše, vijekovima duhovno pustošene, domaje gomile knjiga. Sve bolja od bolje. Naša iskrenost, naš prvi nepogrješivi učitelj u gnozi, dobijala je pomoćnike. Bilo je i ljepše i lakše putovati zajedno s uzorima koji su iz dana u dan nastavali naše oči. I vodili onog ko je htio do postaje najvećeg. Do Posjednika vremena.

Moderni svijet, s Gutenbergom, Televizijom, Internetom..., htio ne htio, služi svoga Imâma vremena (‘a). A s njim, s al-Mahdiem (‘a), sa Upućenim, s tim posljednjim

¹⁶ Pjesma *Bolesno oko* iz iste zbirke.

učiteljem i suputnikom, od date postaje, putuje samo onaj koji je prošao prethodne; i stupnjeve, i učitelje. Ako bi me sad neko upitao o mome stanju (a više niko i ne pita), ja bih žudno, i s olakšanjem, odgovorila: Svjetlo umjesto mene!

Da nisam dala ovakav naslov cijeloj ovoj knjizi, samo je izraz poštovanja prema njezinu iranskom priredjivaču. No, pisac u meni, dakle esteta, raduje se što će svaki, čestit, čitatelj doživjeti njezin unutarnji esteticizam. A onaj, kome se posreći, i vrhunsku estetičnost spoznaje - da ova tama, zapravo, i nije. Da jest samo Svjetlo, umjesto njega, baš kao i umjesto mene, i umjesto svega postojećeg.

I na kraju: ja nipošto ne pripadam ljudima koji opsesivno u svemu vide neki nadnaravni znak. Ali gotovo opsesivno vjerujem da je upravo naravno da ja posljednje redove ove knjige (koju, ipak, intimno zovem *Svjetlo umjesto mene*) ispisujem na dan šahadata Fâṭime az-Zahre ('a), Fâṭime Blistave. Najuzoritije žene svih vremena i svjetova, kćeri Najplemenitijeg Allâhova Poslanika Muhammada, neka je Allâhov blagoslov na nj i na njegov čisti rod, (džannatskog) izvora Kawtar, kćeri, žene i majke bezgriješnih učitelja izlazaka iz tmica na svjetlo, kojih je Imâm Ȣumaynî jedan od najuzornijih djaka.

Melika Salihbeg Bosnawi

U Sarajevu, 25. kolovoza 1999.